

INUIT ATAQATIGIIT

Inatsisartuni

14. februar 2017



UPA 2017/44

Inatsisartut suleriaasiat §33 naapertorlugu aalajangiiffigisassatut imaattoq saqqummiuppara:

Meeqqat atuarianni atuarnermut ilaatillugu sungiusaammik sulinermi assigiimmik sillimaserneqarnissaannut Naalakkersuisut suliniuteqarnissaat pillugu inatsisartut aalajangiiffigisassaattut siunnersuut. Suliami tassani kommunit, Center for Arbejdsskadesikring attuumassuteqartullu allat sapinngisamik Naalakkersuisunit akuutinneqartariaqarput.

Inatsisartuni ilaasortaq, Debora Kleist, Inuit Ataqatigiit

Tunngavilersuut:

Sungiusaatigalugu sulineq atuartut annerit atuarnerannut nalinginnaasumik akuulersimavoq. Sungiusaatigalugu sulinermi suliffeqarfik toqqaannartumik akuuffigineqartarpoq, atuartullu suliffimmi sulineq nalinginnaasoq misilittarpaat. Mianersorfissat isumagineqartaraluartut sungiusarluni sulinerup nalaani ajutoornerit pisinnaasarput – taamaattumillu atuartut sungiusaatigalugu sulinermini, sulisutuulli allatut sillimaserneqarsimanissaat pingaaruteqarpoq.

§37 naapertorlugu apeqquteqarnermit nr. 4-2017-imi erserpoq, ullumikkut atuartut atuarnerisa nalaanni kommunit sillimasiinissaat inatsisitigut piumasaqaataanngitsoq, taamatullu aamma annerit sungusaatigalugu sulinerisa nalaanni. §37 naapertorlugu apeqqtinnut akissutip, kiisalu Center for Arbejdsskadesikringimut saaffiginninnerma takutippaat, Kalaallit Nunaanni sulinerup nalaani ajoqusernermut sillimasiineq aalajangersimasumik atorfeqartitanut taamaallaat atuuttoq.

Atuartullu sungiusarlutik suliffeqarfimmiinnermini aalajangersimasumik atorfeqartuunngimmata inatsit naapertorlugu sillimaserneqarsimanngillat. Naalakkersuisullu akissutaannittaag paasissutissiissutigineqarpoq, kommunit ataasiakkaarlutik meeqqat atuarianni atuartunut atuuttumik sillimasiinnaasut, kommunilli ataasiakkaannguit kisimit namminerisaminnik taamaasiorsimasut.

Isumaqarpunga meeqqat atuarianni atuartunut sillimasiissutit malittarisassiuunneqarnissaannut attuumassuteqartut tamarmik suleqatigiinnissaat pingaaruteqartoq. Taamaasiornikkut atugassarititat assigiit toqqissisimanartullu tamanut atuuttunngortissinnaavagut. Isumaga naapertorlugu kommunit atuartut sillimaserneqarsimasuunissaannut nammineerlutik aalajangiisinnaaneranannut tunngasoq nalilersoqqillugulu misissuiffigisariaqarparput.

Pisap iluani assigiissaartunik pitsaanerusunillu atugassiinissaq sulissutigissallugu soqutiginnassaaq. Siunnersuutiga tigulluarneqassappat sillimasiissutissap suliarineqarnissaanut periusissat assigiinngitsuusunnaapput. Atuartut sungiusaammik sulisut tamarmik sillimaserneqarnissaannut Nunatta Karsiata akiligaanik sillimasiinissaq periarfissanut ilaasinnaavoq. Aaqqiinermilu taamaattumi aningaasartuutissat Nunatta Karsianit toqqaannartumik akilerneqassappat. Nunatsinni tamanut atuuttumik aaqqiinermi amerlasuunut

UPA 2017/44

J.nr. 01.25.01/17FM-LABU-00044

Side 1 / 2

atuutsinneqarnera akikillisaataasinnaavoq, peqatigalugulu nunatsinni meeqqat tamarmik, sumi atuaraluarunik sumiikkaluarunilluunniit il.il., assigiimmik atugassaqaartinneqassallutik. Taamaasilluta meeqqat atuartut ilaqutaallu tamaasa toqqissimasunik atugaqartissinnaavagut. Siunnersuutinnili Naalakkersuisut qanoq ittumik aalajangersimasunik aaqqiissuteqarnissaannik piумaffiginissaat kissaatiginngilara, aaqqiissutissalli pitsaanerpaajusup meeqqanullu tamanut atuuttup nalilersorneqarnissaani susassaqaartut tamarmik peqataatinneqarnissaat naatsorsuutigaaara. Taamatullu kommunit, Center for Arbejdsskadesikring il.il. akuutinneqarnissaat neriuutigaaara.

Pisortanut aningaasatigut allaffissornikkullu kingunerisassat

Naalakkersuisut nunamut tamarmut atuuttumik aaqqiissummik suliniuteqassappata, suliami tassani allaffissornikkut AC-ip sulineranik ukiup sisamaraarterutaanit annerunngitsumik annertutigissaaq, tassa 125.000 kr.-inik naleqarluni. Aningaasat taakkua allaffissornikkut atugassiissutaareersut iluanni nassaarineqarsinnaasariaqarput.

Sillimmaseeriaatsip kissaatigineqarumaartup qanorpiaq akeqarnissaanut nalilersuinissaq piумinaappoq, tassanimi atuartut qassit pineqarnissaat, sillimmasiissutip qanoq ittuunissaa, ajutoornerit amerlassusissaat il.il. apeqqutaassapput.

Taamaattorli Danmarkimi 2017-imut Aningaasanut Inatsimmi atuartut ilinniagaqartullu sungiusaammik sulinerup nalaanni ajutuussagaluarpata taarsiissutissatut 1,0 mio. kr.-it illuartissimavaat (Finansloven 2017, hovedkonto 20.72.26), kontomullu pingaarnermut oqaaseqaammi nr. 151- mi taarsiinissami makkua pineqartut allaaserisimavaat, *"atuartut sungiusaatigalugu suliffeqarfimmiittut, suliffeqarfinnut pulaartut aaqqiissuusaniluunniit assingusuni peqataasut. Peqataasut tassaassapput ilinniagaqarniartut inuussutissarsiuutissamullu siunnersorneqarniartut, sulili inuussutissarsiummut piginnaanngorsarnissamik allartitaqanngitsut, imaluunniit suliffeqarfeqarnermi ilinniagassami suli tiguneqarsimangitsut."*

Danskit aaqqiisimanerat Kalaallit Nunaanni sillimmasiinissamut siunnersuutigineqartumit annertuneruvoq, Danmarkimili meeqqat atuarfianni sungiusaatigalugu sulinissaq pinngitsoorani aqquasaagassatut inissisimangilaq, taamaattumillu Kalaallit Nunaannut naleqqiullugu atorineqannginnerulluni.

Suliniutissap qanoq aningaasartuutaatiginissaanut missingersuusiornissaq ajornakusoorpoq. Taamaattorli qulaani eqqartorneqartut naapertorlugit ukiumut annerpaamik 200.000 kr.-inik aningaasartuutaanissaa missingiunneqarpoq.

Namminersorluni inuussutissarsiuuteqarnermut aningaasatigut allaffissornikkullu kingunerisassat

Sillimmasiissummik aaqqiinerup namminersorlutik suliffiutillit atuartunik sungiusaatigalugu sulisunik tiguserusunnerulernissaannik kinguneqassaaq. Tamanna illinniartup namminersorlutillu suliffiutillit attavigiilluarnissaannut nukittorsaassaaq.

Innuttaasunut aningaasatigut allaffissornikkullu kingunerisassat

Suliffinnik sungiusartut ataasiakkaat sillimmaserneqarnerisigut atuartut ataasiakkaat, angajoqqaat suliffiillu sungiusarfiusut aningaasatigut toqqissisimanerulersinneqarsinnaapput. Atuartut suliffimmik sungiusarfissamik nassaarnissaat ajornannginnerulersinneqarsinnaavoq, tassami ajutoortoqassagaluarpat sillimmaserneqarsimasuuneq suliffeqarfiutillip ilisimariissavaa.